

**Retrenchment**  
**by Gonar Musor (Batch 26)**  
**20/08/20**

Si Nita ay isang OFW na sampung taon nang nagtatrabaho sa isang F&B establishment sa Singapore. Nalaman niya na na-retrench siya sa trabaho dahil sa epekto ng pandemya. Maraming negosyo ang nalugi dulot ng mahabang pagsasara nang ipataw ng Singapore ang circuit breaker measures, ang tawag nila sa lockdown.

Isang single mother si Nita. Ang kanyang nag-iisang anak na lalake, 12 taon, ay nasa Cebu na iniwan niya sa kanyang ina at kapatid na babae. Matanda na ang ina ni Nita pero nakakaraos pa naman sila sa simpleng pamumuhay sa probinsiya. Samantala, nagtitinda lang sa palengke ang kapatid ni Nita. Kaunti lang ang kita ngunit sapat na sa pangangailangan nila kung isasama ang perang naipapadala ni Nita buwan-buwan. Masaya na sa pamumuhay nya ang kapatid ni Nita at walang ambisyon na mangibang-bansa rin.

Kasintahan ni Nita si Mike. Ilang buwan na rin simula nang maging sila. Hindi pa naman natatanggal sa trabaho si Mike pero baka sumunod na rin siya sa sunod-sunod na tanggalan sa trabaho.

Dahil sa pandemya, walang kasiguraduhan ang mga natitirang commercial flight at bigla na lang sila nakakansela dahil sa lockdown at travel restrictions sa Pilipinas. Buti na lang nakakuha agad siya ng tiket sa chartered flight na inayos ng embahada para sa mga na-stranded na Pinoy sa Singapore na gusto nang umuwi.

May isang linggo pa sa Singapore si Nita bago makalipad pauwi ng Pilipinas. likot ang istorya sa isang natitirang linggo ni Nita sa Singapore hanggang makasakay siya ng eroplano pauwi ng Pilipinas.

Sa isang linggo na iyon, iikot ang pangamba sa isipan ni Nita. Hindi lang pisikal na pag-alis sa Singapore ang kailangang ayusin.

Natatakot si Nita sa babalikang buhay sa Cebu - pangamba sa pinansyal pati na rin sa kalusugan dahil sa panganib ng COVID-19.

Sa isang linggo na natitira sa buhay ni Nita sa Singapore, iisa-isahin niyang babalikan ang mga tao at lugar na naging bahagi ng buhay niya roon para magpaalam - mga kaibigang kapwa Pilipino, mga katrabaho, mga lugar na pinuntahan, at pinakahuli si Mike.

Kalaunan ay mapagtatanto rin ni Nita na hindi ang pangamba sa babalikang buhay sa Pilipinas ang bumabagabag sa kanya. Ang tunay na bumabagabag sa kanya ay ang iwanan ang komportableng buhay sa Singapore, kabilang na si Mike. Ang pangangibang-bansa niya ay paraan ni Nita ng pagtakas sa pamilya niya sa Pilipinas

para mamuhay ng komportable sa Singapore. Madalas nakakapagod ang buhay sa Singapore pero nakakayanan din naman sa laki ng sweldo at mga day-off.

Magkakaroon na ng tapang si Nita na harapin na ang buhay sa Cebu na may pag-asa at pangako kay Mike na hindi bibitaw sa relasyon nila kahit ano ang mangyari.

Sasakay na ng eroplano si Nita pauwi ng Pilipinas. Pag-upo nya sa loob ng eroplano, sisilip si Nita sa bintana para tingnan sa huling pagkakataon ang Singapore. May pangamba pa rin siyang nararamdaman pero matapang na niya itong susuungin. Nakangiti si Nita habang nakasilip sa bintana ng eroplano.